



*Iesus ressuscite par sa propre puissance au troisieme iour
de mort à vie.*

LES principaux Sacrificateurs & Pharisiens vinrent vers Pilate, disans, Seigneur, il nous souvient que ce seducteur, quand il viuoit encore, dit; Dedans trois iours ie ressusciteray. Ordonne donc que le sepulchre soit gardé iusques au troisieme iour, de peur que ses Disciples ne viennent de nuit, & qu'ils ne le dérobent, & disent au peuple qu'il soit ressuscité des morts, dont le dernier abus seroit pire que le premier. Pilate leur dit, Prenez-en la garde, allez & le gardez comme vous sçauz : Et ils s'en allerent, & enuironnerent le sepulchre de gardes, & scellerent la pierre du sepulchre. Or nonobstant ce, Iesus ayans esté trois iours au tombeau, ressuscita de mort à vie par sa seule puissance, comme il auoit predict auparauant à ses Disciples. Les gardes du sepulchre furent estonnez, demurerent comme morts, & annoncerent aux Sacrificateurs toutes les choses qui estoient aduenües; & ayans pris conseil, ils donnerent bonne somme d'argent aux gens-d'armes, disans : Dites que ses Disciples sont venus de nuit, & l'ont dérobé comme vous dormiez. Et si le President Pilate vient à ouïr cela, nous luy persuaderons qu'il est ainsi, & vous mettrons en assurance enuers luy. Iceux ayans pris l'argent firent ainsi qu'ils auoient esté enseignez, & ce bruit a esté diuulgué iusques auioird'huy.

S. Matthieu Chap. 28. S. Marc Chap. 16. S. Luc Chap. 24. S. Iean Chap. 20.